

Ogni
can
mena
la coa,
ogni
mona
dise
la soa

Discursi da ostarìa

Carta
canta,
vilan
dorme

Cuotidiano che vien fuora ogni tanto, che scolta, conta e smentisse tuto

DIREZION, REDAZION, AMINISTRAZION, STANPARÍA, VÈNDIA, LUOGO DE NÁSSITA, MAGAZIN: TUTO DA PESSATI

DOVE E QUANDO

de TOMASO

Disime dove che se cata on posto che se possa parlare sol stesso momento de sport, de politica, de cinema, de television e de tuto quello che te passa par la testa senza savere gnente de tuto, senza èssare obligà a trucesse, a pareciarse prima, a savere de cossa che se parlarà, senza 'vere paura de dire quello che se pensa parché te sé che nisuni te cazarà on microfono in man! Disime sa catè on posto dove che se pole parlare male de uno che xe 'pena 'ndà fora da la porta e dirghe su de tuto, che tanto no 'l ghe xe. E dopo, però, se no te lo vidi par calche dì, informarse preoccupà se par caso no 'l gabia ciapà calche malan o se 'l sia 'ndà via co la fèmena senza avisare, che allora el ciapa el resto.

Disime dove che se se cata cussi se no so on'ostaria, co in pi el vantàjo de dirghe a l'osto che el caffè fà schifo e che la cicareta la xe freda o che la scota e prométare, senza mai mantegnere, de canbiare ostarìa.


Eco, allora, che quello che no se cata in nessuna altra parte del mondo se cata oncora int'on'ostaria, on luogo dove che se pole imbastire ogni sorte de discorso.

Parché i discursi che se fà in ostarìa no i vale gnente. Forse...

SCADENZE

El 31 de zenàro xe scadù el bolo de la machina e anca la tassa par la television. Chi che no ga pagà ocore che 'l se sveja, anca se forse xe massa tardi e adesso rivarà na multa col gropo. Che la xe merità!

Indovina indovinèlo...



PASQUA XE PASSÀ, CHI XELO QUESTO QUA?
Assè la risposta a l'osto che po' vegnarà estrato chi che ga indovinà. No se vinze gnente. (soluzion al nùmaro prima).

PREVISION DEL TENPO

Che sia ciara na roba: le prevision del tempo le xe ...tempo perso, sia par chi che le fà che par chi che se informa. Difati, da quando che 'l mondo xe mondo, el primo a fregarsene de le prevision el xe proprio el tempo che, fra l'altro, no 'l distingue se xe marti o doménega...

PARCOSSA E PARCOME

LÉTARA DEL DIRETORE

Caro ti, che te vien a passare calche ora so sta ostarìa, a gavarissimo pensà de darghe on tajo nuovo a sto luogo, dove che de solito, oltre che squaquarare on fià de tuto, se leze anca i giornali che el paron del locale el cronpa, i soliti giornàli "nazionali". Tuti boni, parcarità, ma che i dise senpre le solite robe: el governo cussi, l'oposizion colà, e l'Inter e el Milan, i cicristi che se droga, le veline che le se inamora tute d'i zugaduri, e via discorendo. A ghemo sentio el bisogno de dire anca noantri la nostra e - roba mai successa al mondo - anca ti la tóa. E come se fà? Se fà tuto co sto jornaletto, sto folietto ca ghemo pensà de farse in casa, co i mezi moderni e co le nostre e le to idee, i nostri e i to pensieri, le nostre e le to rogne e anca cétera. La novità la xe questa e scusa se te pararà poco. Ogni tanto, senza coparse (ca semo squasi tuti in pension) quello che ne vegnarà oja de dire lo metemo par scritto e lo roessémo so sta pajineta, na volta mi, na volta ti, chi che vole, insoma. E se te va ben, bon, senò lo femo instesso.

On'amicizia longa ani, in bruso par via de promesse che no vien mantegnù

La vargogna fà la barba

Dal nostro infiltrà, no se dise chi.

Quando che la parola de on omo fà aqua el mondo casca, anzi, el rùgola...

Se le informazion xe juste - ma no ghemo gnente da dire so la rispetabilità del nostro infiltrà in zona - semo davanti a na situazion che no amete scuse. No ghe xe santi: se uno dà la parola so na costion e po' no 'l la mantien xe fadiga che se possa continuare a considerarlo on omo. Ma 'ndemo ai fati. Ghe xe on grupeto de amighi che se cata tute le doméneghe pa' 'ndare a camminare sui Coli; e l'amicizia la xe cussi salda che uno de quisti, contento par avere fatto on afare, el ghe promete na zena a staltri. Contento elo e anca staltri, senpre quando che se magna! Ma no xe tuto: el toso poco dopo el fà 'nantro afare e drio a questo el promete 'nantra zena. Fin qua, dirà el lettore, gnente de male. Xe vero, ma ghe xe on "ma"... Xe passà ani, sia dal primo che dal secondo afare, ma de zene no se ne parla e cussi vien spontaneo domandarse: ma 'l toso, xelo scarso de schei o xelo scarso de parola?